



Rajnath leniba nung Operation Sindoor
atemala jembitsü

Indian Super League
asayatsü: Chaubey



AB PM-JAY aser CMHIS nung mozüki asem tanaben sendakteper

Dimapur, Chiteni/July 25 (TYO): State nung ano private hospital asem financial year 2025-2026 asoshi Ayushman Bharat Pradhan Mantri Jan Arogya Yojana (AB PM-JAY) aser Chief Minister Health Insurance Scheme (CMHIS) nung re-empanelled asüba metetdaksür, ta Nagaland Health Protection Society (NHPS) sangdong ka ajanga ashi.

Tang tesüsa re-empanelled asüba mozüki temji Christian Institute of Health Sciences & Research (CIHSR), Chümoukedima; Faith Hospital and Institute of Medical Sciences, Dimapur aser Nikos Hospital, Dimapur.

AB PM-JAY aser CMHIS

beneficiaries temi item mozüki nung cashless treatment agitettsü, ta sangdong ajanga ashi.

Maneni beneficiaries tem dang <https://cmhis.nagaland.gov.in/hospitals/2> nung oa Nagaland nung empanelled hospitals tenüngtem aser empanelled hospital shia speciality services reprangtsü akok, ta ashi.

Nagaland tesem ajunga nung private hospitals tem tanaben empanel asütsü asoshi NHPS-i kanga meranga inyaker. Inyakyim renloka aoba osang maneni lemsateptsü. Osang tali jangjatsü asoshi Toll-Free Helpline No:1800-202-3380 nung jembitsü akok, ta sangdong ajanga ashi.

Dy. CM Patton-i Niuland nung ketdangsürtem saksalemtsü ayongzük

Dimapur, Chiteni/July 25 (TYO): State telungi illegal immigrants tem aitba nokdangtsü asoshi main entry lenmangtem shibangba ya kisüng masü, kechiaser district telungi aittsü lenmang balala lir, ta Deputy Chief Minister, Yanthungo Patton-i ashi.

State nung immigration tebilemtsü asadanga arütsü tesemtem sema jajaba sülen Brehostibarnü Deputy Commissioner, Niuland indang Conference Hall nung Niuland district administration, Police, GBs, NGOs aser nübur lenirtem den Patton-i senden ka mena liasü.

Immigration tebilemtsü asoshi agencies ajunga den sorkari yariteptsü aser iba tebilemtsü bentettsü asoshi stakeholders ajunga lungjemer inyaksü mapangji tangya lir, ta pai ashi.

Arütsülen GB aser nübur lenirtemi tongtipang shilem agitsüla, ta pai ashi aser parnok dang pei aliba tesem nung immigrants jangjatettsü ayongzüka liasü.

Kasa senden nung MLA, Achumbemo Kikon-i jembidang, asenok külemi item tebilemtsü süoki ia agizüka meinyak tashi asen lanu putu tarutsü tia lendong nung lir ta ashi.

Sorkari yariba aser sorkar dak tamang kaa police forces temi tensa aziüoktsü asoshi amoa moi meranga inyaktar, ta

Commissioner of Police, Dimapur ajanga ashi.

Deputy Commissioner, Niuland, Sara S Jamir-ia district administration aser agencies ajungai sorkar dak temulung lema iba tensa aziüoktsü asoshi amman-gsangwa metitemi inyaktar ta senden nung ashi.

Linük ka academic tashiji shisatsü ajanga jangjatsür: Dr.S.C. Jamir

Dimapur, Chiteni/July 25 (TYO): Linük ka indang academic tashiji shisatsü ajanga jangjatsür, ta Ex-Chief Minister of Nagaland aser Goa, Maharashtra, Gujarat aser Odisha indang toba angh, Dr. S.C. Jamir-i ashi.

Dimapur Government College indang 59th Foundation Day cum Felicitation Programme ka college auditorium nung July 25, 2025 nü agidang sentong akhumdong ka ama jembidang, Dr. S.C. Jamir-i 59 buba Foundation Day amungba aser lenla balala nung takok anguba asoshi college nem tenüngsang agüja liasü aser college dang mawajembatem shisadangtsü ayongzüka liasü.

Tenüng ya tashi tulutiba lir, anungji tesüiba küm 59 nung college ajanga yangluteta aliba noksa aser tenüng ulushitsü asoshi shisadangtsüla, ta pai ajungshia liasü.

Tang tashi asenok 'passive learning' dang lir, anungji asenoki angazüktsü asoshi hadir yanglutsüla, technology amshia education system tajungba kuma yanglushitsüla, ta Jamir-i ashi.

Alima tejakleni kanga kera aoba tensa den lirumedema tesayurtem alitsü nüngdaker. Alima tesem ajunga nung aser talisa technology tsütsü shisatsü kanga kera renloka aor, anungji asenoka asen mapang nung

nüngdakba den lirumedema aor asü masü, ta pai asüngdang.

Tarutsü jenjang takzütsü asoshi lenmang tajungtibaji asenoki yangertsüla, anungji asenoki asen ket nung aliba 'tanü' tia anepalutsüla aser ibaji ajanga tarutsü anepalutettsü, ta pai ashi.

Tanü asen Naga nunger ket nung facilities aser education aliba yagi asenoki Nagaland komala ka yangerner, ta pai asüngdang.

Asenoki kechiserna ajak molok ka (politics) nung yuja lir, koba ajanga Naga society ainba nung tetsükdaksü agütsür. "isms" ajanga Nagaland rajang kumdaksür, anungji asenoki asen lokti nungi "isms" zünger mezüngmai aliba samadaksütsüla, ta Dr. S.C. Jamir-i ashi.

Nagaland nung aliba lanur tem dak tokteptsü tashi lir, anungji linük aser alima den tokteptsüla, ta ashi.

Pai lanurtem dang pei sasa alima aser India indang senso ama bilemtsüla, Nagaland tajungba akumtsü asoshi lenmang lapotsüla, Naga nunger tarutsü tia yangertsü atema hadir aser rongsen ama alitsüla aser nisung ajak telemsa makai litettsüsa Nagaland yanglutsüla, ta Dr. Jamir-isa ayongzük.

Iba sentong ya college indang Foundation Day munga aser jenjang tajung nung takok anguba

kaketshir nem tenüngsang agüja aser 2025 nung graduate asüba kaketshir tem dang tepela sayutsü asoshi agia liasü.

Sentong nung Dimapur Government College nungi discipline balala nung University Topper 12 nem kulizüng kaket den senpet agüja liasü.

Kasa mapang DGCSC, NCC (Boys), NCC (Girls) aser NSS nungi graduate asüba züngsemtem nem Certificates of Appreciation for Special Contributions aser sports, literary activities aser performing and fine arts nung Certificates of Appreciation and Special Achievements agüja liasü.

Iba sentong nung N. Sentinungla Pongen, HoD, department of Philosophy, DGC menden liasü aser Dr. T. Tiakaba Jamir, Principal, DGC ajanga pela agizükba o jembi, DGC indang NCC-i anir college anthem aten, sentong tenzüka Dr. Vivi Swu, Assoc. Prof., dept. of History ajanga sarasadem.

Maneni sentong lemladakja Jatmei Wangsa, B.A 5th Sem, History Dept. ajanga temeja ken ka aten, Dr. Meripeni Ngullie, HoD, History dept. & Convenor, Students Welfare Committee ajanga awards tem agütsü aser Dr. Hare Krushna Parhi, Nodal Officer, NEP 2020, DGC ajanga melepzüng o jembia sentong tembang.

NSF-i Naga nunger HSLC & HSSLC toppers 114 nem tetushi agütsü

Kohima, Chiteni/July 25 (TYO): Tanü Naga Students' Federation (NSF) ajanga HSLC aser HSSLC examinations 2025 nung Naga nunger toppers nem tenüngsang agütsüba sentong ka SIRD Hall, Kohima nung ayongzüka agia liasü.

Iba sentong nung kaketshir 114 - HSLC nung 89 aser HSSLC nung 25 - nem tetushi agüja liasü.

Sentong akhumdong ka ama Minister, Rural Development & SIRD, Metsübo Jamir-i jembidang, academic nung takok tajung angur nem tenüngsang agütsü aser NSBE tatidang nung takok anguba kaketshir ajunga dang pelaba lemsatepa liasü.

"Nenok ajaki takok nguogo. Nenok ya tarutsü lenirtem lir aser nenoki asen state asoshi yimchiyimjung bener arutsü," ta pai ashi. Nenoki takok anguba tanü ajaki pela agizüker, aser tatem nung takok ya Tsüngrem kabu nung lir, ta pai kaketshirtem dang ashi.

"Nisung kar tekolok mechira ta masü. Tsüngremi asenok ajak yimya balala nung moatsür...aser tanü toppers nung medensemer temia meranga züngogo," ta Minister Metsübo-i ashi.

Pai kaketshirtem dang takum nung liyonga aodang Tsüngrem nem tenüngsang agüja aser sarasadema alitsü ajungshia liasü.

"Iba takok ya tatem masü, saka tajemdak dak long ka lir. Takum nung tayongzükba tali ajurutsü, aser anogoshi timtem alitsü," ta pai ashi.

Minister Metsübo-i tsürabor aser tesayurtem danga pelaba lemsatep aser parnok dang kaketshir takok anguba nung ola madoki nokdakba tongshi ta aja. "Parnoki nenok asoshi sarasademtsü, nenok len ani aser nenok yari," ta pai ashi.

Pai NSF danga ajak asoshi shisaliok aser employment system atema inyakba asoshia tenüngsang agüja liasü. NPSC aser NSSB ama ochishia nübu shimba yimya nung merit nung ajemdaker maongka agütsütsü asoshi inyakba asoshi pai federation dang pelaba lemsatep.

"Naga nunger ajunga asoshi maongka kasa agi backdoor systems melenogo," ta Minister Metsübo Jamir-i ashi.

"Tanü nungi tenzüka nüburtemi nenok dak rangloksü. Iba sempet agizükba ya konang ka kisüng masü - ibai teinyaktsü khuret ka lir. Asüng nai tamakok

ajurura, aji na atema kisüng masü saka nenok dak rangloker nisung aika asoshi tezüdangtsü asütsü," ta pai tekumdangtsü ashi.

Kaketshirtem rongnung tetoktepbpa tali akumba indanga pai shisem. "Tanü kaketshir 114 nem tetushi agütsür, saka nenok ama kumnüba kaketshir 20,000 dak tema lir. Nenok takok ajanga dangar tali meranga inyaksü ajungmesodakjang," ta pai ashi.

Minister Metsübo-i kaketshirtem dang ajemalia, jeret-pereya jajatsü, ochi nung alitsü, yimya tajung amshitsü aser takok angutsü asoshi tamang nem len anidaktsütsü ajungshia liasü.

NSF Tir Medovi Rhi-i iba sentong nung jembidang kaketshir nem tenüngsang agütsü aser chichiba takokji academic tsütsü takok anguba kisüng masü saka ajemaluba, nübur tenzüka yimya tajung amshiba nung lir ta ashi.

"Tanü benjongba aser takok anguba anogo ka lir... Nü academic nung nai alizüng tajung ka tongogo, aser nenok ajak nem tenüngsang agütsür," ta pai ashi.

Tsürabor temi masetshi yariba asoshi pelaba lemsatep aser tanur temi takok anguba nung nenok ya tashi tongshi ka lir, ta ashi.

"Takok angutsüba lenmang nung asükum lira, lendong ang ajurutsü. Anungji asenok ajemalushiti," ta NSF tiri ashi.

"Nenok ya shisatsü agizüker kisüng masü, saka temelenshi adokdaksür, tarutsü jenjang yanglurtem lir," ta pai ashi.

"Ajaki angutsüsa Naga nunger sentsüwangshitsü aser lungjemtsü asoshi asenoki maneni meranga inyakti. Nenok takok ajanga dangar ajungmesotsü aser nenok tarutsü anogotem nunga maneni sentsüpranga alitsü imla atar."

Sentong nung NBCC secretary social concerns Dr Villo Naleo ajanga kaketshirtem ajungshi aser toppers asoshi sarasademja liasü.

Iba sentong nung minister meina Advisor, Labour, Employment & Skill Development and Excise, Moatoshi Longkumer arua liasü.

Sentong nung NSF assistant general secretary Kenilo Kent menden liasü, Pastor Phezoucha Baptist Church Rev. Velavoyi Keyho ajanga sentong tenzüka sarasadem, NSF vice president Mteisuding-i tepela o jembi aser Mezanuo Ngukha-i temeja ken ka tena liasü.

Hospitality Job Fair ka ayongzüka agiogo



Dimapur, Chiteni/July 25 (TYO): July 25 nü Eagle Crest Institute - East Campus, Middle Colony nung Mega Hospitality Job Fair ka ayongzüka agiogo. Iba sentong ya Eagle Crest Training Academy & Consultancy aser Government of Nagaland na longjemer Chief Minister indang flagship programme - Nagaland Skill & Entrepreneurship Development Mission (NSEDMD) kübok ayongzüka agiogo.

Kasa anogo Eagle Crest Institute atsülangshia yanglur aliba semzüka liasü.

Sentong nung Advisor to the Chief Minister aser Investment & Development Authority of Nagaland (IDAN) mendenbuba, Abu Metha tongti tejaoker liasü. Sentong nung dena aliba lanur mapa bushirtem, kaketshirtem, trainer aser India aser bendanglen nungi partner tem den o jembiba mapang Metha-i, Nagaland nung aliba lanurtem nem skill balala aser tashi agütsütsü atema tanen makai bendanga agüja inyakba atema Eagle Crest Training Academy & Consultancy nem tenüngsang

agütsü. Paisa, state nung aliba lanurtem nem training agütsüba dang masü saka timla agütsüba, parnok ajungshiba aser temaba jenjang tongtettsü atema sabang tajung agütsüba aser mapa agütsüba atema Eagle Crest lenirtem aser team ajunga nem tenüngsang agüja liasü.

Metha-i, Nagaland Skill and Entrepreneurship Development Mission (NSEDMD) nükla lemsatep, koba lanurtem tarutsü nung mapa balala atema renema atatsü asoshi skill shidak angazükdakja renema toktsütsü atema lir, ta ashi. Paisa, temaba jenjang tongtetba, meranga inyakba aser temulungtetba tulu alitsü koda tongtibang iba indang lemsatepba den takok angutsü atema shortcut kecha mali aser temaba jenjang ya tanen makai meranga inyakba aser shisatsü ajanga ajangzüktettsü ta ashi.

Lanurtem terenlok atema sorkar bendanga agütsü aliba indang jembiba mapang Metha-i, state-i NSEDMD kübok mezüngbuba küm lanur 5000 nem tangazükba agütsütsü nükjidong ayu ta ashi. Paisa, sorkari sen 5,000 nungi 1,00,000 tashi temsüa aliba kaketshirtem

nem skill loans agütsü aser iba den Chief Minister's Micro Finance Scheme ajanga subsidy aser senotsü teyari balala agütsü, ta ashi.

Tatem nung pai lanurtem dang nükjidong tulu ayutsü aser meranga inyaksü ajungshia liasü. Iba Hospitality Job Fair nung state kübok district balala nungi kaketshir aser lanurtem noklang aikati shilem agiogo.

Sentong nung lokti pela agizükba o jembiba mapang Chief Executive Officer, ECTAAC, Temjenkala Aier-i, Mega Hospitality Job Fair ya sentong ka dang masü saka Naga nung lanurtem nem tashi agütsütsü atema mission ka aser parnok alima nung hospitality dak sendakba nung maongka balala den sendakteptsütsü asoshi lir, ta ashi. Laisa, tongti tejaoker, industry partners international recruiter tem dang pelaba lemsatepa lisü.

ITC, Treebo, MMA, Deltin, Oberoi, HR India Overseas, aser Volume nungi Industry lenirtem den international recruitment agency tem iba sentong nung dena liasü.

SCERT-i ayongzüka consultative workshop ka agiogo

Dimapur, Chiteni/July 25 (TYO): Samagra Shiksha-i fund asüba Revised Nagaland School Quality Assessment and Accreditation Framework (NSQAAF) aser State School Standards Authority (SSSA) dak sendakba nung anogo ka atema consultative workshop ka ayongzüka agiogo.

Iba sentong ya State Council of Educational Research and Training (SCERT) Nagaland aser tongtibang stakeholder tem aser education partner tem den longjemer SIEMAT Hall, SCERT, Kohima nung July 25 nü agiogo.

Sentong nung o jembiba mapang Director, SCERT, Keviraleü Kerhuo-i, workshop nung tanaben adenertem aser tawa nominate asürtem pelashishia agizükba liasü. Laisa, Department of School Education (DoSE), Nagaland Board of School Education (NBSE), State Council of Teacher Education (SCTE), Samagra Shiksha, NECTAR, All Nagaland Private School Association (ANPSA), All Nagaland School Teacher Association (ANSTA), Diocese, DIETs, SCERT nungi lenirtem aser Task Force züngsemtem dang parnoki teyari

agütsüba atema pelaba lemsatepa liasü.

Kerhuo-i ashiba agi, National Education Policy (NEP) 2020 ya linük ajunga nung ta benoka inyakba mapang ka lir, koba kaketshirtem kaketshisatsü bushiba nung dang masü saka emotionally, socially, aser morally renloka odakja aso 21 buba atema renema toktsütsü nükjidong nung benokdar.

Kerhuo-isa, iba nükla ya nongittsü atema Ministry of Education-i, SARTHAQ (Students' and Teachers' Holistic Advancement Through Quality Education) implementation plan benokogo, ta ashi. Lai ashiba agi, state, union territories aser education dak sendakba lokti tentet balala den sensaksemba sülen iba sentong ya yangluogo, kong tebilemdangba balala lemsatepba 7000 dak tema bendenloka lir.

SARTHAQ ing tongtibang features tem lemsatepba mapang Kerhuo-i, Task No. 215 ya SQAAF terenlok dak rangloker lir ta ashi. Laisa, iba inyakyim ya sorkar aser jurila school naprongla pre-primary nungi higher secondary tashi nongittsü nükjidong nung benokogo.

Laisa, SQAAF ya azüoktsüba atema mechanism ka masü saka school tem temaba jenjang tongtettsü atema teyari agütsüba hadir ka lir, ta jangjashitsü. Lai ashiba agi, iba yagi ochishia inyaksü, odangtettsüsa inyaksü ajungmesor.

State shilem indang jembiba mapang Keviraleü Kerhuo-i ashiba agi, Nagaland nung school jenjang aser excellence tanaben rasa ashitsü atema SQAAF ya temelenshi bener arutsüba hadir ka asütsü.

Keviraleü Kerhuo-i, iba workshop yagi longjemer inyaksü atema sabang tongtibang ka agütsü, ta ashi. Laisa, sentong nung shilem agirtemi tajangshiba balala lemsatepba ajanga iba framework ya Nagaland dak apet yanglutsü asoshi teyari agütsütsü.

Maneni Keviraleü Kerhuo-i, stakeholder ajak dang framework yanglutsü atema teyari agütsütsü mepeshia liasü.

Sentong ya Joint Director, SCERT & Convenor NSQAAF, Moalong Imti lenisüba nung agia aser NSQAAF indang Vice Principal, DIET, Kenilo Semp-i metetdakja liasü.

ACH Chennai aser RBSK Nagaland na tenangzüktepba yanglu

Dimapur, Chiteni/July 25 (TYO): Apollo Children's Hospital (ACH), Chennai aser National Health Mission (NHM), Nagaland kübok Rashtriya Bal Swasthya Karyakram (RBSK) Program na tsünga July 24 nü Mission Director, NHM office nung Memorandum of Understanding (MoU) ka nung sign süogo.

MoU ya tanur arishi küm 0 nungi 18 tsünga alirtem Congenital Heart Diseases screening aser treatment atema yangluogo. MoU nung NHM-i, Apollo Children's Hospital, Chennai den longjemer Nagaland nung screening camp tem ayongzüka agütsü, aser tanur shirnok temang talila anepalutsü nüngdaker parnok Apollo Children's Hospital, Chennai dangi refer asütsü aser iba mapang sen intokba ajak ya RBSK model costing dak ajemdaker NHM-i agütsütsü aser RBSK-i atakzüker aliba dang nungi senotsü tali intokra Apollo Hospital Charitable Trust-i agütsütsü.

ACH-i, mozükidang temang anepaluba mapang shiranger kinungertem angati anenzüktsü atema anepalutsütsü koba shiranger shia nisung kaka asütsü. Parnokisa paediatric cardiac surgery/interventions nung sorkar doctor tem nem training agütsütsü aser MoU nung shilem ka ama support staff tem nema training agütsütsü.

Sentong nung sensaksemba mapang Mission Director-i ACH

dang kanga pelaba lemsatep aser iba telongjem ajanga Nagaland nung aliba nüburtem ajangzüksü imlaba lemsatepa liasü.

Kasa mapang nung Apollo Children's Hospital and Women's Hospital unit tekolakba Niranjani. S-i, Meghalaya, Tripura aser Arunachal nung tajangshiba tajungtem indang lemsatep aser ashiba agi, par mozüki-i State nung Tele Consultation dena amenoktsü aser taruba kümtem tsünga state nungi nurse tem nema maongka agütsütsü, ta ashi.

MoU nung RBSK, NHM, Nagaland atema Mission Director, NHM Dr. Avile Zao aser Apollo Children's Hospital atema Apollo Children's and Women's Hospital unit tekolakba Niranjani. S, nati sign süa liasü. Niranjani meina D. Rajkumar, Senior Manager, Health Care Services, Apollo Children's Hospital aru aser State Program Officer, (NHM) Dr. Keveduyi Theyo aser NHM nungi ketdangsürtema iba tenangzüktepba yangluba mapang dena liasü.

NHM-isa, kasa ken o dak sendakba nung SKY Hospital aser SHIJA Hospitals & Research Institute, Imphal, Manipur den 2018 küm aser Health City Hospital, Guwahati, Assam den 2025 küm MoU nung sign sür lir aser Hearth Screening aser Treatment dak sendakba nung teyari agüja arudar.

Kohima Aor Pensioner Telungjem inti senden amen



Dimapur, Chiteni/July 25 (TYO): 3buba Kohima Aor Pensioner Telungjem (KAPT) inti senden July 25 nü KABA Lerie Fellowship Tenla Ki, Kohima nung menogo.

Sentong ya KAPT tir Dr. Watijungshi Jamir lenisüba nung agia liasü. Sentong ya N. Wati Atsongchanger, Joint Secretary-i anir pensioner tem shirnok iba lima nungi pilaogo parnok nem tetushi agütsüba mapang agia tenzü. Parnok nem aküm tetushi agüja ola madoki sarasadem mapang tatsüka agi.

Sentong nung health session ka CIHSR Dimapur nung Dietician Imsutula Jamir-i achaayanga agi. Lai tain küma aoba mapang kechi koma achitsüla, iba dak sendakba nung tangazükba agütsü. Laisa, tain akümba den physiological temelenshitem ajangshia aoba indang lemsatepba den anema alitsü atema chiyongtsü tajung achitsü nüngdakba lemsatep. Tongtibang onüktem rongnung tetsü mesamadaktsütsü atema protein-i teyari agütsüba, digestion nung teyari agütsütsü aser cholesterol ajemdaktsütsü

atema fiber koda tongtibang aser tzü peria ajemtsü koda tongtibang iba indang lemsatep. Lai anogo nung tzü 25-30 mL/kg ajemtsü ajungshiba den calcium, magnesium, zinc, sodium, potassium, aser vitamins tem indang shilem lemsatepa liasü.

Maneni lai, well-balanced, nutrient-dense diet achitsüba, chiyongtsü tilala mapang shia chia alitsüba, temo aser chiyongtsü tashi machitsüba, tzü peria ajemtsüba aser yi, moko achiba nungi pila alitsü ajungshia liasü. Laisa, anema alitsü atema mapa tilateri inyakhshia alitsü ajungshia liasü.

Sentong nung NBCC General Secretary Rev. Prof. Mar Pongen-i, Tsüngrem o ajanga pensioner tem ajungmesoa liasü.

Sentong nungsa sensaksem aser Q&A session agiba den ketdangpurtem menden melentepba mapang agia liasü. Sentong ya Dr. Temsu Jamir, Vice President-i tepela o jembir tembanga liasü.

Senden nungsa Kohima nung pensioners 639 züngoksema aliba indang metetdaktsü.



July 25, 2025 nü Ato kilonser Narendra Modi, Maldives tonga aoba sülen hotel ka nung India nungertemi pa agizükdang tangokba noksa nung angur.

Rajnath leniba nung Operation Sindoor atema jembitsü

New Delhi, Chiteni/July 25 (Agencies): Hombar nungi tenzüka Parliament House anaprongla nung Operation Sindoor atema jembitsü; Lok Sabha nung defence minister Rajanth Singh leniba nung o enteptsü, ta osang ka ajanga metetdaksü.

Lok Sabha nung iba onük nung o entepba mapang sorkar tsütsülen nungi Union home minister Amit Shah, foreign minister S Jaishankar aser BJP MP ana- Anurag Thakur aser Nishikant Dubey nungeria jembitsü.

O entepba nungji Ato kilonser Narendra Modi-a

shilem agitsüa akok.

Rajya Sabha nunga Mongolbar (July 29) nungi tenzüka Operation Sindoor atema o enteptsü. Lok Sabha nung iba onük nung o enteptsü atema ghonda 16 lezmüksüogo aser Rajya Sabha nunga ghonda 9 lezmüksüogo.

Taküm April 22 nü kiralongrartemi Pahalgam nung raliwalirtem amakba mapang nung nisung 26 khaseta liasü. Iba sülen May 7 ayaterm nung India-i Operation Sindoor tenzüka Pakistan aser Pakistan occupied Kashmir nung kiralongrar camp 9 amak.

Hokolbarnü Lok Sabha nung opposition MP temi yimyim ayima longkak aitba sülen July 28 anügdang 11:00 ako tashi senden thinenogo.

Hokolbarnü Rajya Sabha nunga nikongdang 2:00 ako nung senden thinenba sülen Hombarnü 11:00 ako nung ang senden tenzüksü.

Lok Sabha nung menden Bharatiya Janata Party MP Jagdambika Pal-i opposition züngsemtem dang private members bill benoktsü atema longkak aitba anentsü mepishia liasü, ajisüaka maneni longkak aita yimyim ayimba agi pai senden thinenba liasü.

Bihar election nung BJP-i menden 101 aser JD(U)-i 102 nung tokteptsü

New Delhi, Chiteni/July 25 (Agencies): Assembly menden 243 aliba Bihar nung taküm November ita nung election agitsü lia tang state nung yimtenren party temi menden lemsaba onük kanga bulua jembitsü.

Bihar assembly election nung BJP-i aniba NDA teloktep aser Mahagathbandhan/INDIA teloktep na tsüngda tokteptsü.

Tang Bihar nung NDA sorkar lir aser taruba election atema iba teloktep nung party tem tsüngda menden lemsar tokteptsü atema bangjemogo ta osang angazüker.

NDA teloktep nungi tangbo BJP-i menden 101 nung tokteptsü aser Chief minister Nitish Kumar-i aniba JD(U)-i menden 102 nungi tokteptsü.

Iba teloktep nung densema aliba Chirag Paswan-i aniba LJP-RV nem menden 18 nungi 22 lezmüksütsüa akok, Jitan Ram Manjhi-i aniba Hindustani Awam Morcha nem menden 7 aser Uppendra Kushwaha-i aniba Rashtriya Lok Morcha nem menden 9 lezmüksütsüa akok.

Ano külen tanga osang ka ajanga ashiba agi, anogo ishika tejaklen linük tatong Tir Jagdeep Dhankhar-i ajungbena menden toktsüba sülen NDA-i iba menden atema Chief Minister Nitish Kumar shimtsüa akok. Yamaji süra aser Bihar nung NDA-i maneni takok ngura chief minister ji BJP nungi asütsü.

Ajisüaka JD(U)-ibo, item osangji khenyongi tiyazü, kechiyong Nitish Kumar-i

maneni chief minister inyaksü, ta metetdaksü.

Ano külen Bihar nung opposition Mahagathbandhan teloktep nunga party tem tsüngda menden lemsar tokteptsü aliba dak sendakba nung timtem adoka lir.

Mahagathbandhan teloktep nung densema aliba Jharkhand Mukti Morcha-i RJD dang menden 12 meshir aser Congress party-ibo menden 90 tashi meshitsüa akok.

Iba dak alia VIP aser Left party temia taoba mapang dang nungi tang menden teimba lezmükjang ta akhanger.

Ano külen taruba Bihar election nungbo Asaduddin Owaisi-i aniba AIMIM-i Mahagathbandhan teloktep nung adentsü tebilemba lir.



NAGALAND HEALTH PROTECTION SOCIETY

AB PM JAY aser CMHIS sentong kübok sen cash mamshii shirangertem anepalutsü melen empanel süa aliba mozü ki kar nungbo 'reimbursement' asoshi dang inyakba osang Nagaland Health Protection Society (NHPS)-i angazüker. Anungji, iba sentong nung teyari angutsü purtem ajak teyari shitak angutsü asoshi empanel süa aliba mozü ki ajak dang sen cash mamshii treatment agütsütsü inyakyim agüja aliba shitak benschitsü aser shirangertem dang nungi sen talila memeshitsü mepishir.

Teyari angutsü pur 'Beneficiaries' atema :

- Na mozü kidang admit asüba mapang nü meyong AB PM JAY/ CMHIS card agüjang.
- Aser nü dang :
 - i) Mozü / nüngdakba osettem aser tashidak tendangba amala nüngdak atema sen meshira,
 - ii) Approve süa aliba jenjang dang nungi talila sen temloker meshira,

Teyari angutsü purtemi idangjisa item nung ya metetdakjang:

- i) Toll-Free Helpline No: 1800-202-3380 ajanga jembiang

MESÜRA

- ii) Yangi Email sang : support-nhps@cmhis.nagaland.gov.in
Sen cash mamshii temang anepaludaktsütsübaaji nü temeten,menungnangi tongtepratepangma.

Linük temzüng okila yanglushitsü tebilemba mali: Centre

New Delhi, July 25 (Agencies): Parliament nung Centre sorkari, linük temzüng nungi 'secular' aser 'socialist' olong agienadoktsü atema sorkar tebilemba mali, ta metetdaksü.

Linük Emergency mapang 1976 küm 42buba Amendment nung item olong ana ya inoksema liasü.

Tawa item olong ya linük temzüng okila (Preamble) nungi agientsü ta jemba o entepba dak sendakba nung sorkari, item olong agientsü mesüra repringshitsü atema sorkar tebilemba mali, ta Parliament nung metetdaksü.

Rajya Sabha nung Question Hour mapang Samajwadi Party MP, Ramji Lal Suman-i asüngdangba langzüdang Minister of State for Law & Justice, Arjun Ram Meghwal-i, yimtenren mesüra public nung iba onük nung o entepa alitsüa akok, ajisüaka iba atemaji sorkari official süa kecha meinyaker, ta metetdaksü.

Union minister Meghwal-i, "Linük temzüng okila nungi 'socialist' aser 'secular' agienadoktsü atema sorkari legal ajanga mesüra linük

temzüng kübok inyakyim kecha meinyaker. Yimtenren mesüra public-i iba onük nung o entepa alitsüa akok, ajisüaka item olong yanglushitsü mesüra agientsü atema sorkari kecha mebenok mesüra sangdong kecha magütsü," ta metetdaksü.

Meghwal-isa, "Linük temzüng okila repringshitsüa kümra ajak tebilemba asadangtsü nüngdak," ta metetdaksü.

Minister-isa yaküm November ita nung Supreme Court-i ken o ka angadangba mapang obendang agütsüba metetdaksü.

42buba Amendment nung item olong züngsemba anema temepishiba ken o benokbaji Supreme Court-i magizük.

Iba mapang nungji Supreme Court-i, linük temzüng nung Arrla 368 kübok linük temzüng okila yanglushitsü atema tashi agüja lir, ta metetdakja liasü.

June ita nung Rashtriya Swayamsevak Sangh (RSS) general secretary Dattatreya Hosabale-i, linüktemzüng okila nung 'secular' aser 'socialist' ya Emergency mapang nung inoksema liasü, anungji iba ya repringshitsü nüngdak, ta jemba liasü.

School ki chirepba nung tanur 7 asü

Jhalawar, July 25 (Agencies): Hokolbarnü Rajasthan kübok Jhalawar district nung aliba school ki shilem ka chirepba lendong nung tanur tenet asü aser tanur 28 yirugo.

Hokolbarnep school tanurtem anepdang sarasadem agitsü lia iba lendong atalok.

Piplodi Government School nung Class 6 aser Class 7 takdang chirepba ajanga tanur 35 rembanga liasü, ta police-i metetdaksü.

Cement amshia lungro agi asüba ki chirepba jana jagi tanur aika rembangba sülen tesayurtem aser tsüraburtemi tanurtemji jana nungi atsüteta

kümzük.

Police ketdangser Nand Kishore Verma-i, "Tang tashi nung tanur tenet asüba jangjaogo aser aika yirugo," ta metetdaksü.

Iba lendong nung yiruba tanurtemji Jhalawar hospital aser Manoharthana health centre-i anir oa yaridar.

District hospital nung doctor kati, yirua alirtem rongnung tanur 9 bo kanga mejungi yirur Intensive Care Unit nung treatment agidar, ta metetdaksü.

Iba osang angashia linük Tir Droupadi Murmu aser Ato kilonser Narendra Modi na densema lenirtem aikati tejashi lemsatepogo.



26buba Kargil Vijay Diwas atongtsü jelia July 25, 2025 nü Kargil nung 1999 küm Kargil rara nung asürtem kinüngertertem Lamochen viewpoint nung wako asongba sentong nung adenba noksa nung angur.



TIR YIMYIM YIMOBILEM (EDITORIAL)

DIMAPUR

KÜPTOKNÜ

CHITENI 26, 2025

Ki kiburtem dak aket !

Nagaland nung tangar bendanger temelaba melii arua alitsü memelar aser ano Nagaland nung yi ayoktsüa memelar, anungji item memelaba ozüngtemji mapa kuma inyaka otettsü atema ki kiburtem dak tuluka keta lir. Atangji, ki dang masü saka ali kiburtemia pei lima tangar bendanger ket nungi kumzüka ayutsü asoshi shilem tuluka agitsü nungdaker. Item nungdak reprangtetba agi, Naga Students' Federation (NSF) teloki Nagaland government dang ILP agütsüba maparen takok ngua inyaka otettsü asoshi pei kidang tangar bendanger lidaktsürtem, bara ki kiburtem, aser ano pei li nung bendanger ki yanglur lidaktsür, ali kiburtem nema teinyaktsü khuret karbo agüja ILP agütsüba ozüng nung enoksemtsüla ta takangba agütsüba government-i inyaktsüba mapa shitak ka reprangteta agütsüogo. Nagaland nung bendangertem nungoka aita aliba tebilemtsü tulu liakasa, mulung anisüngzüka kaji, tang tashi nungbo Dimapur nung tesem kar dak alaka Nagaland nung tangar bendanger, talisa, tzümartemi ali alia ki yangluba aser alu yima kibur akümba purtembo mali, saka parnok ajakji ayangertem dang lir aser ayangertemji asenok Naga nunger ki bara nung alir aser kar Naga nunger li nung alimelen agüja ki yanglur alir, anungji parnokji Nagaland nung aruagi senso kuma alitsüsabo talidak ali kimong mali. Atangji, Dimapur nungbo akhidang Nagaland state makümdang arua alirtem Marwari, Bengali, Punjabi, Nepali aser Muslim nungertem lir. Aji oda, item alidakji Marwari Patti, West Yard aser Nepali Goan ama kiyong tenüng dena agüja lir. Iba denji ano Dimapur yimti nungbo lenmang dena Gurmukh Singh Road (GS Road) aser Anwar Hussian Road ta tzümar saka Dimapur sensopur tenüng agüja lir. Item jagi Dimapur uludaktsür. Ajisüaka, itemjia Dimapur adenerbo Nagaland nung kecha tesem nunga ali kimong alia kibur mekümtettsü. Item dakji alaka Miya nunger, shirnok Bangladesh nungi aru südi ta asenoki mulung melemi bilemer, parnok yabo Naga nunger ali kiburtem nem alimelen agütsür peisasa pei ki yanglur alir. Ajisüaka, parnoka tangar li nung lia Nagaland nung kum talangka alir asünungji, Nagaland nung senso mesüaka, joko parnok aliba tesem dangjia Miya colony ta tenüng jatsüa amshir. Aji oda, Miya nunger, teimbaka Bangladesh nungi aruba Muslim nungertem ya Nagaland nung sensobo masü ayangertem dang saka yim aser mepu tenüngbo jateter pei senso li nung alir amai alir. Joko, Miya nungertem ya asenoki asen lima nungi meindok nung parnok dang nungibo asenok timtatamba aser takoksaba asütsüsa asenok libaliro jenjang aser tia kumogo, kechiyong parnoki asen lu yimtsür, asen kiset shiruru reprangtsür aser kisüjensü mapa ajak parnoki inyaker. Anungji, tarutsü pututem asoshi bilemja asenok Naga nunger sensosangertemi tanü timtem arema Miya nungertemi inyakba mapaji asenoki belenzüka meinyakra, tebang agi tapu aika jembiyonga, asüngbo asenok parnok kübok alitsü. Item ajakji bilemdanga asenok sensosangertem nisuug shia teinyaktsü mapa kakabosa inyaktsüla. Aji oda, government nung alirtemi ozüng shitak akanga benshitsü merangtsü, lanur aser kaketshirtemia peisasa inyaktetba nungi taküm alitsü merangtsü aser ali aser ki kiburtemia pei ki aser pei li nung temelaba mali aser maben aruba bendangertem pei ki aser pei li nung alitsü memelatsü. Aji oda, tangar bendanger asen lima nung temelaba magii nungoka aita malitsüsa nokdangtsü atema tanüker aser mitkar meyirijang ta shimtsüba dang nungibo, ki aser ali kiburtem nem ozüngsa khuret agütsüba tajungba asütsü. Aji oda, ILP asoshi dang masü saka Nagaland nung yi mayoktsü asoshi takok ngua inyaktsü atemabo yimten aser arogoi yi ayokba ki kiburtem den khuret lemsateptetra, iba jagiang takok tuluka angutsü, kechiyong yi ayokba kiji ajak Naga nunger Khristan kibongtem indang bara kitem lir. Item bara ki kiburtem den arogo tenzükertemi par ki tonga orr sarasadem mapang ka külemi agi nung Tsüngremi par mulungjang nung mapa inyaktsü.

OLEMSABANG

Sorkar aser Arogo "Service Rules" medemdangba (Research findings)

A. M. TOSHI JAMIR (Dimapur)
Retired DIRECTOR (GoN)

(Yashi adok nungi...)

ANNUAL PERFORMANCE ASSESSMENT REPORT (APAR): Akidangbo Annual Confidential Report ta aja. Iba-ya ANNUAL PERFORMANCE APPRAISAL REPORT ta-a ajar. Sorkar Officers toklang tenzükertem-i kum piyong nung inyaktetba sayutsü asoshi kum shia, kum temli pei sasa zülur Controlling Officer ajanga Secretariat Office-i yoker. Grade III tem Directorate aser Grade IV (MTS) reports-ji District office nung, teshimtet Officers temi (designated Officers) zülur ayur. Sorkar Assessment Year-ji Calendar Year masü saka Financial Year (April to March) ta angazüker. Sorkar inyakyim amaji joko Arogo tila aser tulu aika nung amshitsü tenzükogo. Yangi Arogo-temi amshiba kar sayur: (a). Arogo nung toklang tenzükertem Pastor-i ANNUAL CONFIDENTIAL REPORT zülutsü, review aser accepting authority ji Deacon Board; (b). toklang tenzükertem ajaki kum nung anaben, kijai inyakba osang (Personal Performance Report) Board of Deacon nem agütsütsü; (c). toklang tenzükertem Personal Monthly Performance Report ita pezü nung ken Pastor ajanga bendentsü aser Deacon Board nem agütsütsü; (d). toklang tenzükertem Personal Appraisal ji kum nung ken agitsü. Annual increment aser maneni mapa inyaka aotsü (service continuation) maparen iba tasadangba dak ajemdaker inyaktsü; (ano iba amala).

SORKAR aser AROGO kar INYAK-YIM MEDEMDANGA yangi zülusemtsür:

(1) KÜM KWI ABENSAR KÜLEN MAPA NUNGI ANENTSÜ ?

- SORKAR : tasoba kum 60 mesüra tenzüka kum 35, koba tama tongdir anener.
- AROGO nunga PASTOR/ASSOCIATE PASTOR atema itemi kar renema aliba sayur: (a). ishimba agi kum 45 nung mapai aitsü, saka kum 10 atema dang, nungdakra apuloktsütsü akok, saka kum 60 tashi dang inyaktsü; (b). mapai aiding tajemba agi tasoba kum 45, saka tenzüka kum 25 mesüra tasoba kum 65 tashi dang inyaktsü; (c). tasoba kum 25 nung mapai aitsü akoktsü aser tasoba kum 65 tashi inyaktettsü; (d). tetsüi asoba kum 65 abensadang anentsü; (e). tasoba kum 55 aser tenzüka kum 20, koba tama südir; (f). kum 10 atema, atsülangtsüa akok, saka kum 60 tashi; (g). tasoba kum 65 tashi; (h). tasoba kum 60 tashi; (i). tasoba kum 60 mesüra tenzüka kum 30 tashi; (j). nütsüng ishika aliba aser rongsen nung timtemba arogo tem nung item tasadangba maliba Arogo tem-a lir;.

(2) **LEAVE: (kar dang shisemer):-** Sorkar aser Arogo nung Casual leave kum nung anogo 12, saka Arogo ka nungbo anogo 13 agütsüba angur.

(3) **PATERNITY LEAVE:** Sorkar tenzükertem atema kinüngtsü tanur asodang pa anogo 15 sodi angutsü (2019 kum nungi). Arogo ka nung Paternity leave anogo 15 angutsü atema lemtetba züngshiogo.

(4) **MATERNITY LEAVE:** Sorkar- 180 days, with less than two surviving children (2017 kum nungi). Arogo tem nung iba amai balala angur: (i). 3 ben, tanur asoba shia ita 3; (ii). 2 ben, asoba shia anogo 60; (iii). 3 ben, asoba shia ita 2; (iv). 2 ben, asoba shia ita 3; (v). asoba shia anogo 30; (vi). tenzüka piyong ajak agi anogo 90; (vii). tanur asoba mapang anogo 120; (viii). tanur asem tashi asoba shia anogo 90; (ix). tanur asoba shia ita 2; (x). tanur anaben asoba shia ita 6.

Note : Arogo kar nungbo Maternity Leave anogoji repringshir bendenloktsü nung junger ta bushiteter.

(5) **EARNED LEAVE:** kum shia anogo kwi angur?; leave bendena akaba melena mapa nungi anendang anogo kwi atema sen angutsü? SORKAR: anogo 30; anogo 300 atema sen angutsü. AROGO-tem ishika : (a). anogo 15, encashment mali; (b). anogo 20, anogo 240 atema sen angutsü; (c). anogo 30, anogo 300 atema angutsü; (d). arogo ka nungbo anogo 36 agutsür ta zülua lir, anogo 300 atema angutsü; (e). anogo 30, anogo 90 atema; (f). anogo 30, anogo 180 atema angutsü; (g). anogo 30, anogo 240 atema sen angutsü; (h). anogo 30, anogo 150 atema sen angutsü; (i). Arogo kar nungbo Earn Leave magatsür/encashment mali. Ano Leave itemia sa agütsür: Half Pay Leave/Commuted Leave; Extra Ordinary Leave; Medical Leave; ano danga.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

South Korea Arogoi North Korean mission asentenshir inyaktsü



July 17, 2025 nü South Korea yimtiba, Seoul nung 7buba North Korean Church Planting Forum nung Rev. Cho Ki-yeon, Professor Hong Moon-ki aser Rev. Yoo Gwan-ji nunger leniba nung tanabuba session agidang tangokba noksa nung angur.

Seoul, July 25, 2025 (Agencies): Korea nunger nüchiso anguba aser ana kuma lemdangba sülen küm 80 ajungba nüngtem nung July 17, 2025 nü South Korea yimtiba, Seoul nung 7buba North Korean Church Planting Forum ayongzüka kaogo.

Iba senden nung South Korean Arogoi longjemmer inyaktsü, North Korea nung Arogo asentenshitsü aser Arogo tasen tenzüksütsü atema asalentong yanglu.

"80th Anniversary of Liberation: Diagnosis and Vision for North Korean Church Planting," omen nung ajemdaker ayongzükbä sentong ya Seoul nung Cappella Hall, Chongshin University nung agi.

Iba sentong ya Presbyterian Church in Korea (Hapdong) Institute for Unity & Mission Development, Hapdong Presbytery Network's Northwest Region North Korean Mission Committee aser Unification Hope Mission Society-i longjemmer ayongzükbä.

Iba sentong ayongzükbä nung Unification mission aser North Korean mission den sendaktepa aliba telok 10-ia yaritepa liasü; item telok rongnung Christian Unification Studies Association, North Korean Church Research Institute, Mission Uniting Korea Council, Sungsil University Christian Unification Leadership Center, Jubilee Unification Prayer Network, Chongshin University Graduate School of Unification Development aser Unification Ministry Pastors' Association lir.

Mezüngbuba session tenzüka tekülem sentong agi, aser iba sentongji Institute for Unity and Mission Development secretary, Pastor Cho Young-gi leniba nung agi, Northwest Region North Korean Mission Committee nungi Ruth Trio-i ken ka aten aser Institute deputy director, Rev. Hong Seung-young-i Lai azüng. Iba sülen Korean Church Unification Mission

Denominational Council chairman, Pastor Kim Chan-gon-i 'Tangatetba ana' (Mark 6:7-9) onük nung sayutsüngia liasü.

Pastor Kim-i, "Longjemtsüji (North aser South Korea longjemtsü) ajak taginüba lir aser North Korea Arogo yangershitsüji külem mangdang lir. Longjemba ajanga Tsüngremi melungba ama moatsütsü, anungji asenoki Tsüngremi melungba ama inyaktsüla. Mezüngbuba tangatetbaji 'longjemmer inyakba mission' aser tanabuba tangatetbaji 'tamang agi inyakba mission asütsü," ta metetdaksü.

"Asenoki sen dak dang merangloki Tsüngrem dak rangloksüla aser tamang agi inyaktsüla," ta paisa metetdaksü.

North Korean Mission Committee chairman, Rev. Yoon Young-min-i sarasademba sülen Northwest Presbytery Council chairman Rev. Jung Young-gi-i o semlok jemi, Sungsil University nungi Prof. Ha Chung-yeop-i salem osang lemsatep aser secretary general, Rev. On Sung-do-i sangdong kar metetdakja liasü.

Rev. Jung-i, "North Korea aser South Korea longjemdaksüner aser North Korean Arogo tanaben yangershidaksünertem ajaki Jangdaehyeon Church aliba tesem nung Kim Il-sung kürakyanglu chireptsü atema sarasademtsüla aser Tanela Temeshi milak jangrutsü atema sarasademtsüla," ta ashi.

Prof. Ha-i, "Ita ka tsüngda asenoki 1945 küm August 15 nü nüchiso anguba sülen küm 80 abensaba amongtsü. Iba dak alia 1958 küm September 9 nü North Korea-i yimsü ajak nokdangtsü aser North Korea nung Arogo 3,089 anentsütsü atema ozüng ka benoka liasü. Iba mapang nungji pastor tem aser putirtem teimbaka tepseta liasü aser tamangertem Yanggang aser North Hamgyong Provinces-i

meindoka liasü," ta metetdaksü.

Paisa, "Unification Hope Mission Society-i, kobi melii Khristar mongpu North Korea-i arutsü imlar, aser iba mapang nungji North Korea nunger adianutem Tenla ki balala nung adenshia tekülem agi tenzüksü," ta metetdaksü.

Tanabuba session nung Chungshin University nung history education professor Hong Moon-gi-i "80 Years Since Liberation: Diagnosis of North Korean Church Planting" onük jembia liasü.

North Korea nung meimchir temeden aser mission dak sendakba nung pai, "Iba ya tangatetba hadir ka ama dang masütsüla saka Tsüngrem temeim angatetdaksütsü atema asütsüla. North Korean Arogoji North Korea nung alirtem atema lir, anungji parnok tamangji parnoki Tsüngrem bushiba nung ajemdaker asütsüla," ta ashi.

Paisa, "North Korea nung Arogo tasen tenzüksü atema inyakbaji Tsüngrem yimli asentenshitsü atema temeshiba mapa ka südaksütsüla," ta ashi.

Kasa sentong nung Institute for Unity & Mission Development nung research director, Rev. Lee Soo-bong-i "Transformation of Korean Church's Role in North Korean Church Rebuilding and Denominations' Responsibility," onük jembia liasü.

Q&A session nung Institute for Unity and Mission Development nung tongti, Rev. Cho Ki-yeon-i, "North Korean mission tenzükbä sülen küm 40 tsüngda asenoki iba mission ya asenok mission masü saka Tsüngremer mission lir ta rajemogo. North Korean mission mapa inyaktsü, renemtsü aser süngjang atangtsüji Tanelar mapa lir. Iba mission mapa kanga mezülongi inyaker amai asenokibo bilemstü akok, ajisüaka Tsüngremi South Korea nung inyakba ama North Korea nunga mapa inyakdar," ta ashi.

ANOGO ABEN TSÜNGREM DEN

Maongka Halleluya

Tenüngsang Ken 105 nung Israel nunger otsü ashir aser ken züluri yimya nung anguba ama otsü nung Tsüngrem tsüngnep angu, ibaya Halleluya agi atem. Ibai Tsüngremi Abraham dang nangzük, Isak dang azüngashi aser Yakob den akangshi. Parnok yongsük ishika dang aliba mapang Tsüngremi parnok kümzük. Parnok azükarua alidang parnoki Tsüngrem ozüng amatok.

Pai linük nung ayawara adokdaksü. Tsüngremi Yosef Ijipi yok aser Pa nübur anitetsü Mosa yok. Tsüngremi parnok dangi ammag yok aser tzü azü kümdaksü. Parnok akhümbangtsü Tsüngremi mepet yok aser sangwadaksütsü mi yok. Tsüngremi lung jakmatsü aser parnok nem tzü agütsü. Ken züluri ibai meyipa reprangba Halleluya agi shibang.

Kari maongka dang nungi yimya nung Tsüngrem temelaba angur. Yakobi rem, süngdong aser petinutem atema Tsüngrem tenüng asang saka kodang Yosef anir ao pai ashi, "Item ajak ya Pa anema lir." Mapang kar nung ken züluri "Halleluyah" ta Tsüngrem tenüng asangtsü mejangra. "O kü nela, nai kechiba tim atemer? Kechiba kü mulung nung na jashir? Tsüngrem dak yimlaang: kechiaser ni pa tanaben asangtsü, kü teyari aser kü Tsüngrem" (T.Ken 42:5).

Tsüngrem meimertem asoshi mapa ajak tajung asoshi inyaker, anungji Khristan kati Tsüngrem tenüng masangtsü kecha temeten mali. Ammag nung Tsüngrem tenüng sangang kechiaser Pai sangwatsür. Tejashi asoshi Tsüngrem tenüng sangang kechiaser Yisui ashi, "Ne tejashi tepela agi melentsü." Mepet asoshi Tsüngrem tenüng sangang kechiaser mepet manung Pai temeim tongnügen yoker. Mopung asoshi Tsüngrem tenüng sangang kechiaser iba nung nisung chiri ne den jajanür. Shibai ozüng nung tashi angar, "Kibuba nung pelaang," Pa tanela nung anüngdang aser aonung minute shia pa/la mulung nung Halleluya lir.

SC-i UP sorkar dang anti conversion ozüng mamshii alitsü tuyu

July 25, 2025: Tawa Supreme Court nung Uttar Pradesh nung anti-conversion ozüng tasenba anema benokba ken o angadangba mapang nung Supreme Court-i UP sorkar dang, iba ken o metembang tashi anti conversion ozüngji mamshii alitsü tuyuogo, ta International Christian Concern (ICC)-i metetdaksü.

Alliance Defending Freedom (ADF)-i Uttar Pradesh Prohibition of Unlawful Conversion of Religion Act, 2024 anema SC nung ken o ka benoka lir. Iba ozüng ya yaküm July ita nung sorkari legislative assembly nung agizüka liasü.

Anti conversion ozüng ya tashiyim amshia mesüra mesüzüka yimsü meyipdaksüba nokdangtsü atema lir, ajisüaka iba ozüng tim mesüi amshia Khristantem sarasadem sentong agiba, tekülem agiba aser Khristantem telongjem sentong agiba-a nokdangar.

July 16 nü Justices Vikram Nath aser Sandeep Mehta nati

iba ken o angadangba mapang nung UP sorkar dang iba Act nung ozüng tasenji mamshii alitsü tuyu.

Iba osang ya UP nung Khristantem atema osangtajung ka lir, kechiyong Khristantem nem tiyazü nung tai tonglokja apur aser mapang talangka tepuokdak yur asüngdangyar.

Mapang shia state nung nationalist teloktemi Khristantem nija kidang mesüra Tenla kidang tekülem sentong agiba mita oa timtem agütsür aser tiyazü kuli nung ajemdaker police-i Khristan lenirtem aser pastor tem apur.

Uttar Pradesh nung anti-conversion ozüng tasenba ajanga nisung mashii kati ken o benoktsü atema temelaba agütsür.

ADF-i 2021 küm benokba anti conversion ozüng masü saka 2024 küm yanglushiba anti conversion ozüng tasenba anema nokdaker. Tang SC tetuyuba tasenba ajanga state nung Khristantemi teimla terabo angur.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Terpungo

(adj) züngya terpezü sülenba (fifteen)


* Ni küm terpungo asüdang yimtak lia liasü.

Teru

(adj) telemlem, jangratemsü (pleasant)

* Lenir tajung alidang lokti nung teru lia akümer.

OLONG PAITEP # 7219



TIPIEN

2. Tejembini - 6
5. Iba oset ya ajaki aginer - 3
6. Aou tapu ka - 5
7. Prangpong agi tepset - 5
8. Temokok tsünglanglen - 5
11. Langtem - 5
13. Sündong tatembang - 5
14. _____ sadoka - 5
15. Terok nungi adokba - 3
16. Tamagitsü nung mapang endok - 6

LANGTSÜNGLEN

1. Meshitak - 5
2. Anjongmeshi - 6
3. Moijing - 5
4. _____ aren - 5
7. Tezülen - 5
9. O bendangdak - 6
10. Sensatsü - 5
11. Teka amtep - 5
12. Tango _____ - 5

OLONG PAITEP # 7218 TELANGZÜBA

TIPIEN :

1. Kasa, 5. Atamata, 6. Atang,
8. Apang, 11. Benjong, 12. Kinük,
14. Asüng, 16. Nüngjem, 17. Liok.

LANGTSÜNGLEN :

2. Amet, 3. Tara, 4. Sangpang,
6. Asetkong, 7. Aiben, 9. Angsü,
10. Aji, 13. Kija, 15. Nare

NAI-A YA METETTER MA



Nüngtugu professional wrestling asayar Hulk Hogan arishi küm 71buba nung Florida nung par kidang süogo. Pa tenüng shitakba ya Terry Bollea liasü. World Wrestling Federation (tang WWE) ya global entertainment brand ka küma yangerba mapang pai teyari tulu agüja liasü.

Manipur nung President's Rule atsülangtsü atema Amit Shah-i benoktsü



Imphal, Chiteni/July 25 (Agencies): Manipur nung President's Rule ano ita ti atsülangtsü atema Union Home Minister Amit Shah-i, Rajya Sabha nung tang agia aliba Parliament Monsoon Session nung benoktsü imlar.

Rajya Sabha bulletin ajanga ashiba agi, iba bangzüng ya July 24 Brehostibarnü benoktsü liasü, saka Election Commission-i Bihar nung electoral rolls Special Intensive Revision ka benokba anema opposition-i longkak aitba sülen house ya 2:15 pm nung adjourn süa liasü.

February 9 nü Chief Minister N Biren Singh-i mapa

toktsüba sülen Manipur ya February 13 nü nungi President's Rule kübok lir. Constitution Article 356(3) nung President's Rule ya ita trok atema benoktsü aser parliament nung ita trok tembangbaba shia ano ita trok atsülanga oa küm asem tashi benoktetsü, ta shia lir.

Manipur nung tensa maneni mejungi aliba mapang ano President's Rule atsülangtsü atema inyaktepdar. 2023 küm May 3 nü nungi Kuki-Zo aser Meitei nungertem raratepa arudar. Iba azütokshi lendong nung nisung 250 tepsetogo aser nisung 60,000 dak tema pei talidak toktsür jenshiaogo.

Tensa tajungba kümdaktsütsü atema jenjang agia arudar kong Nagaland aser Assam na den Imphal sendaktepba National Highways 2 aser 37 lapokshitsüba dak talisa rangloker jenjang agidar. Highway anaprongla ya Kuki-Zo nungertemi amokbanger aliba tesemtem ajanga süier aser mepetmesü tenzükba sülen Imphal valley nung aliba Meitei nungertem tamshi majung kümogo.

Iba den bendenloksema police indang prangbong 6,000 dak tema auyar aoba meyipa agitsü atema state sorkari jenjang agidar.

Sübokrem agiba atema CBI-i Arunachal nung professor ka apu

Itanagar, Chiteni/July 25 (Agencies): Central Bureau of Investigation (CBI)-i, Arunachal Pradesh kübok Pasighat nung College of Agriculture indang assistant professor ka sübokrem agiba atema puogo.

Aija alisang Pavan Kumar Gaudar aser Matrix Solutions proprietor Anand Kumar Dwivedi nati oset kar aliba mapang ochi mashi inyakyim benoka inyaka public funds mimzüka agia liasü.

Tenaprongla ya CBI-i July 23 nü puogo. Gaudar-i Dwivedi ket nungi sübokrem sen 55,000 agizükba mapang pa CBI-i pua liasü.

CBI-i benokba FIR nung ashiba agi, ken o ya Milton-branded plastic buckets 30 aliba dak sendaka liasü. Bucket tem ya July 3 nü agütsüogo aser bucket shia sen 2,500 agi alizükba sülen ajak senteper sen 75,000 adoka liasü.

Ajisüaka kasa bucket ya shishilembadak sen 1,200 shi agi angur aser ajak senteper bucket 30 aliba nung sen 36,000 shi dang adoktsüla, ibayongji senotsü ochi meshi amshiba jangja aküm.

Bushisüngdangba sülen Gaudar-i Dwivedi dang nungi sen 63,000 meshi, kong billing dak sendakba nung shilem ka ama sen 39,000 aser taoba

mapang tsütatepba atema sen 24,000 meshiba densema lir.

Dwivedi-i sen 55,000 agütsütsü mulunga liasü. Maneni CBI-i, Dwivedi-i Gaudar indang bank account-i sen 1.95 yokba ngutetogo, koba taoba mapang osettsüet aliba mapang sübokrem agütsüba asütsü ta amanger.

Tenaprongla ya police custody nung yua lir aser Prevention of Corruption Act kübok aitsütsü imlar. Bushisüngdang maneni südar aser ketdangsürtemi agricultural college indang taoba mapang shishilembabatem bushisüngdanga aoba mapang ano nisung timba aputsü akok.

Ozüng alema arurtem bushiteta yoktsü atema Manipur nung STF tentetogo

Imphal, Chiteni/July 25 (Agencies): Kuli kakat tejangja makai state nung lia aliba bendangertem jangja sota ayutsü aser meyipa yoktsü atema Manipur sorkari district ajak nung Special Task Forces (STFs) tentetogo.

Iba inyakyim ya Bangladesh, Pakistan, aser Rohingya (Myanmar) nungertem India nung özüng alema lia alirtem bushiteta meyipa yoktsü asoshi Ministry of Home Affairs (MHA)-i linük ajunga nung inyakyim benokba nung shilem ka lir.

MHA-i, States aser Union Territories ajak dang iba

inyakyim atema police ketdangsürtemi achaayangba task forces tentettsü tetuyuba agütsüogo.

MHA tetuyuba dak ajemdaker Manipur sorkari teshimtet tesem kar nung detention camp tem amenokogo. Item facility tem ya özüng alema arua aliba bendangertem meyipa yoktsü atema inyaktepba mapang yua atatsü atema amshitsü.

Manipur Police-i Hokolbarnü sangdong ka ajanga ashiba agi, Bangladesh, Rohingya, aser Pakistan nunger densema aliba özüng alema aruba bendanger ken o ya state

sorkari kanga süoki ia agidar.

Item bendangertem bushiteta aoba, parnok senzusenpong nung tenokdangba agütsüba aser iba amala nisungtem meyipa yokba dak sendakba nung guideline yanglushir aliba Police Headquarters nungi district-level police unit ajak nem agütsüogo.

Inyakyim tashi itshidaktsütsü atema district ajak nung STF tentetogo. Item team tem yagi state nung kuli kakat tejangja makai lia aliba bendangertem bushia aotsü aser temzüng özüng dak ajemdaker jenjang tapet agitsü.

GOVERNMENT OF NAGALAND

DIRECTORATE OF WOMEN RESOURCE DEVELOPMENT

NAGALAND:: KOHIMA.

NO.DWRD/DEV/MTC-4/2021

Dated Kohima, the July 2025

ADVERTISEMENT

The Department of Women Resource Development invites female applicants who are willing to undergo the 2nd Batch of Training Programme under the following trades during 2025-26.

1. Baking & Confectionery : under Multi Training Centre (MTC) Kohima

1	Course Duration	August - October (3 Months)	Intake Capacity
2	Eligibility Criteria	Class X Passed Age : 18-35 (as on 31st July 2025)	6

2. Hairstyling : under Multi Training Centre (MTC) Kohima

1	Course Duration	August - October (3 Months)	Intake Capacity
2	Eligibility Criteria	Class X Passed Age : 18-35 (as on 31st July 2025)	6

NB:

1. Last Date of Submission of Applications in Both Category : 6th August 2025

2. Date of Interview : 11 August 2025

3. Time :10:30 AM onwards

4. Venue : Directorate Office, Meriema: Kohima.

5. Application shall be received on first come first basis in the intake ratio of 1:5 in each course.

Applications addressed to the Director, Women Resource Development in plain paper stating bio-data, 2 (two) recent passport size photos, self-attested copies of the relevant marksheets, Birth Certificate, ST and Indigenous Certificates are to be submitted.

Sd/-

(VILONE SAKHRIE), Director

GOVERNMENT OF NAGALAND

OFFICE OF THE SUB-REGISTRAR OF COOPERATIVE SOCIETIES

MANGKOLEMBA: NAGALAND.

METETDAKTSÜR

MBA, Dated 25/07/2025.

SRCS/MBA/CAN/2016-17/32 : Nagaland Cooperative Societies Act 2017 nung Section 92(2) ano ' section 82 aser Section 83 nung shia aliba ama' Mangkolemba Sub-Division kübok mapa meinyaki anenadoker aliba Cooperative Societies ajak anentsütsü asoshi reprangteta tenüng züludena lir. Item Societies list-ji Office Notice Board nung mataka yuja lir aser Society shia dangi registered post ajangaa yokogo.

Anungji, item anenadoker aliba Society-tem rongnung kari danga ano asentenshia tenzükshinüra, iba sangdong metetdaksüba sülen ita ka tsüngda nung iba office nem tezüluba nung agütsütsü akoktsü.

Iba mapang agütsüba tsüngda kecha osang marura, item Society-temji anentsütsü atema Registrar, Cooperative Societies, Nagaland, Kohima dangi yoktsü.

Sd/-

MTIMENDANG

Sub-Registrar of Cooperative Societies, Mangkolemba, Nagaland.

Israel aser US nati Gaza ceasefire jembishinü yutsür

Doha, Chiteni/July 25 (Agencies): Israel aser US negotiators temi Qatar yimtiba Doha nung Gaza ceasefire jembiba yutsür aotsü telemtetba agiogo aser Hamas tangatetba tajung nung masü ta Washington-i aitsür.

US special envoy Steve Witkoff-i sangdong ka nung, "Tang tesüsa Hamas nungi telangzüba agütsüba sülen shisa agiteptsü asoshi ozü telok Doha nungi kidangi anir arutsü telemtetba agiogo, kechiaser parnoki Gaza nung ceasefire alitsüba tejangraba maliba jangja-jangja sayur," ta ashi.

Israel sorkari kechiba iba yimjung ken o jembiba nungi anizüker aotsüsa akumar mashi, saka Israel ketdangsür kati ken o jembishinüba tangatettep kati arua inyakyim chirepba masü ta ashi.

Witkoff-i sangdongba ngua aoksar aser onok maneni jembishinü akatsü tejangraba lir, ta Hamas-i ashi.

Mediators densema jembishinü nung dena alir ajaki tongtipang onük nung tapok tulu aliba shiogo.

Brehostibarnü sangdong nung, mediators temi kanga meranga inyakaka Hamas-i amalitep akaba mesüra tebilemba tajung nung inyakba mesayur, ta Witkoff-i ashi.

"Hostages tem kidangi anir arutsü aser Gaza nung aliba nüburtem asoshi tensa tajungba adokdaksütsü atema onoki lenmang danga bushidangtsü."

"Hamas-i yamai par atema kisüng bilema inyakba ya maksü lir. Iba rara tembanga Gaza nung teti asoshi yimjung bener arutsü merangba nung onok akang-akanga nokdaka lir," ta pai ashi.

Israel asoshi jembirtem Doha yutsür aoba indang Israel Ato Kilonser Benjamin Netanyahu nungi yimjak nung kecha shia mali.

Ajisüaka Israel ketdangsür kati pa tenüng memetetdaksüi jembishinü loksaba masü ta

nenshia ashi.

Hamas dak "rejectionist and unfortunate approach" lir aser onok shidakba nung meyiptsü nüngdakba jenjang atong aser tawa ajemtsü asoshi lenmang shidak anguba den külemi meyipa arutsü, ta ketdangsüri ashi.

Hokulbarnep sangdong ka nung, "Tetsükdaktsü ajangetttsü aser teti asoshi ceasefire agreement yangluba nung yaritsü yimya nung maneni jembishinü akatsü tejangraba lir," ta Hamas-i ashi.

Tang tesüsa Doha nung Qatar aser Egyptian mediators dener jembishinüba ya hopta ana dak tema liasü.

Brehostibarnü UN indang Palestinian refugee agency (Unrwa) ajanga ashiba agi, Gaza City nung tanur pongu nungi ka chiyongtsü peria achi-ajem masüba lir aser cases anogoshi timba akumer.

International aid organisations aser human rights groups temia nübur ajunga yasatzüratsü indang tekum dangtsü ashi aser sorkar balala dang mera agitsü ayongzüka liasü.

Israel, shiri Gaza telungi teyari bener aiba ajunga azüoker, parnoki iba tesem sapanga ayuba mali ta ashir aser chiyongtsü agi meperiba atema Hamas tenüng asener.

Ita ana ceasefire aliba sülen

Gaza Strip nem teyari agütsüba ajunga Israel-i March ita tetenzüklen nungi soita lir. Ita ana jungnüa lir iba tenokdangba shilem kar lapok, saka chiyongtsü, totzü aser mozü agi anüng-abongba tali ang tamajungba kumogo.

UN human rights office ajanga ashiba agi, taoba ita ana tsüngta Palestine nunger 1,000 dak tema chiyongtsü teyari meshitsü merangba mapang Israel mitkari tepsetogo.

Nisung 766 shi GHF ajanga lapoka aliba distribution centres pezü nungi ka anasa tepset, koba US private security contractors ajanga ketdang asür aser Israeli military zones telung nung lir.

Ano nisung 288 shi UN aser danga aid convoys anasa tepset.

Teyari agütsüba tesemtem anasa Hamas-i rongrong adokdaksür ta Israel-i tai tongloktsür. Par sepaitemi warning shots kisüng khaloktsür aser parnoki civilian dak asaa akhaba mali ta ashir.

Hamas-i anir October 7, 2023 nü Israel south tsütsü maka nisung 1,200 shi tepseter ano nisung 251 pua bener aoba sülen Israel-i Gaza nung military campaign tenzük.

Iba sülen Gaza nung nisung 59,106 tepsetogo, ta iba territory nung Hamas meyong health ministry ajanga ashir.

Sara Duterte anema impeachment trial benokba Supreme Court-i nokdang

Manila, Chiteni/July 25 (Agencies): Sara Duterte anema impeachment trail ka benokba Philippine Supreme Court-i nokdang, anungji linük tatong tir asoshi takok anguba alitsü.

Duterte-i nübur indang sen mashi lenmang nung amshi aser Tir Ferdinand "Bongbong" Marcos Jr tepsettsü amokmeren ta tai tongloktsüba sülen Philippine parliament indang lower house ajanga la mapa nungi anentsütsü February ita vote agitepa liasü.

Ajisüaka Hokulbarnü court odongtar kati osangbener den jembidang, impeachment vote yagi küm ka nung impeachment proceedings aika mebenoktsü constitution ajanga nokdanga aliba nung aibelener ta ashi.

Hokulbarnü osangbener senden ka nung jembidang, Duterte anema ken o benoka aliba nung temeden agütsür masü, ta court-i ashi. Ajisüaka iba obendang ajanga February 2026 tashibo la tatong tir menden nungi matsüngdoktetttsü.

Iba ya ajanga 2028 general elections nung tir menden asoshi tokteptsü tebilemba aliba nung la bhukumer bendentsü mapang tali agütsür.

La anema impeachment vote ya agütsü nungbo, Duterte ya tir atema metokteptettsü.

Iba obendang ya Duterte-Marcos atsütepba nung atalokba tasenba alitsü, kong tena ya tembar aliba tsükchir

akum. Tenaprong taoba mapang tashi tulu aliba lenir tanurtem lir aser 2022 küm "Uniteam" nüngja agütsür political super alliance ka tentettsü asoshi teka amtepa liasü.

Ajisüaka tenati takok ngur mapang tatsüka tsüngta mangatettep adok tenzük.

O tamajung shitepba mapang Sara tebu Rodrigo Duterte-i Marcos dang "drug addict" aja aser lai Facebook post ka nung lai tepsettsü asünungbo Tir-a tepsettsü nisung ka den jembiogo ta ashi. Iba o mechi la anema impeachment proceedings ya tenzük.

Ajungbena Sara tebu ya temesepba mozü anema raraba atema nisung meimchir anema mapa tamajung inyak ta tai tonglokja aliba jembitsü asoshi ajungbena Hague-i anir aoba sülen ano tsükchitep tamajungba akum.

Ajisüaka iba obendang magütsü danga Senate impeachment court nung Sara aitsütsü mesüra ken o jembi tenzüktsü teimla kangabo meliasü, kechiaser May ita general election agiba sülen political alliances melenshi.

Iba election nung Duterte aser Marcos tsüngta mangatettep aliba ya tesashiba liasü aser Duterte-i Senate nung imlaba dang nungi menden timba nung takok angu.

Züngsem 15 aliba Supreme Court ya Sara tebui shimer temi amokbanga lir.

Pakistan Tehreek-e-Insaf-i 'Free Imran Khan Movement' tenzükogo



Lahore, Chiteni/July 25 (Agencies): Linük tesem ajunga nung August 5 nü nungi longkak ait tenzüktsü hopta ishika lia Pakistan Tehreek-e-

Insaf (PTI) ajanga Lahore nung "Free Imran Khan Movement" tenzükogo.

PTI ya taoba ato kilonser Imran Khan chiochtsü akhanger, shiba August 2023 nungi tepuokdak yua lir aser mapa tamajung inyakba ken o balala pa anema benoka lir.

PTI ajanga ashiba agi police temi party bhukumer tem iba longkak aitba sentong nung shilem magidaksütsü mechi apu tenzükogo, ta Press Trust of India dang ashi.

Iba campaign tenzüktsü asoshi Khyber Pakhtunkhwa Chief Minister aser PTI lenir Ali Amin Gandapur ya Honibar aonung menur Lahore tonga aru. Gandapur den PTI lenirtem ya Raiwind nung Sharif kinunger ki anasa amenoka alitsü aser parnoki longkak aittsü atema sentong aser tasa tem yangji yanglutsü.

Taruba ita tetenzüklen nungi tenzüka PTI ajanga Shehbaz Sharif-i aniba sorkar aser military establishment dang

asendenshir takhangba agütsütsü tebilemba lir.

Iba longkak ait tenzüktsü lia police temi Lahore tesem balala nung PTI workers 20 shi puogo, kong party bhukumer tem party lenirtem agizüktsü adenshia liasü.

Iba protest movement nung shilem magidaksütsü nükjidong nung Punjab police temi Lahore aser Punjab province kübok tesem balala nung nisung pua aser ki meita aoba mapa inyaka arur, ta PTI odongtar kati ashi.

Indian Super League asayatsü: Chaubey



Chiteni/July 25, 2025

(Agencies): Indian Super League club tem anisüngzükdakja All India Football Federation tir Kalyan Chaubey-i ashiba agi, iba asayamung ya taküma asayatsü, saka Supreme Court nung ken o bangdaka aliba ajanga menotsü akok.

Chaubey-isa, India tebur team coach anogo 10 tsüngda sangdongtsü. Iba mapa atema Stephen Constantine, Stefan Tarkovic aser Khalid Jamil nung shimdanga lir.

ISL season ajunga masayatsü akok ta bilema aliba mapang asayartem aika pei career koma asütsü

mejangjai liasü.

"League ya masayara football asayartem dang masü saka football dak sendaka aliba nisungtem aika dak kongshitsü. Nisung meyirejang aika dak kongshitsü. Anungji onoki league asayatsü atema takok tashi inyaksü," ta Chaubey-i ashi.

Iba ita tetenzüklen Indian Super League ayongzüka asayaba lokti tentet FSDL-i, All India Football Federation aser club tem dang asayamung masayai sota atatsü ta osang agüja liasü.

Ita ana tejakdang Supreme Court-i All India Football Federation aser Football

Sports Development Limited dang federation indang constitution dak sendakba nung obendang magütsü tashi sensaksem kecha masütsü tetuyuba agütsür liasü.

"Okadaki kodang obendang agütsüdir idangji AIFF-i jenjang agitsü, stakeholder ajak den senden mena Indian Super League densema asayamungtem koda anep anepa agitetsü iba inang sensak asemtsü," ta Chaubey-i ashi.

July 11 nü ISL ayongzüka asayaba telok FSDL-i, 2025-26 season sota atar, kechiyong Master Rights Agreement (MRA) koba AIFF den 2010 küm yanglua liasü, iba ya yanglushitetsü meyanglushitetsü mejangja, ta ashi.

ISL ya yimya agi September nungi April tashi asayar saka Football Sports Development Limited (FSDL) aser AIFF na tsüngda tang nangzükteper aliba ya 2025 küm December 8 nü tembangtsü aser iba mapang tashi nungbo ISL tenzüker ita tasembuba asütsü.

WPL: Abhishek Nayar UP Warriorz coach kümogo

Chiteni/July 25, 2025 (Agencies): UP Warriorz (UPW)-i taruba Women's Premier League (WPL) atema team head coach asütsü Hokolbarnü taoba mapang India nung allrounder Abhishek Nayar shimogo. Taoba coach Jon Lewis den pilaba sülen Nayar shimba osang sangdongogo.

Nayar ya coach tejen ka lir, pa ya Indian team assistant coach liasü aser pa tang Kolkata Knight Riders assistant coach lir. 2024 küm KKR puri IPL akokba mapang pa assistant coach liasü. Asaya aliba mapang pa Mumbai team nungi tongtibang asayar ka liasü aser pai 2005 nungi 18 tsüngda first-class asaya 103 nung run 5749 yanglu aser wicket 173 agia liasü. Pa 2009 küm India team nungi ODI asem asayaogo.

2019 küm asaya nungi anisüngzüka sülen arishi küm 41 tain ya team balala nung coach mapa inyakogo aser pai India indang ODI captain Rohit Sharma, Shreyas Iyer, KL Rahul aser Dinesh Karthik nung amala

asayartem anitetogo.

Nayar ya 2018 küm Kolkata Knight Riders academy indang head coach liasü aser assistant coach ama KKR support staff nung aden. Ano pa 2022 küm CPL nung Trinbago Knight Riders (TKR) head coach liasü.

2024 küm July ita Nayar ya India team nung assistant coach ama aden, saka küm ka majung dang mapa tokja liasü. Iba sülen pa 2025 IPL atema KKR-i assistant coach asütsü shima liasü.

Maneni Nayar ya Mumbai South Central Maratha Royals mentor lir, shirnoki taküm T20 Mumbai League kokogo.

"Warriorz team anitsü atema Nayar shimba atema onok kanga pelar. Iba team ya kanga longjemer lir, tetsübu maka aser aintsü asoshi tetsüraba aliba team ka lir. Abhishek lenisüba nung iba telok yagi langkabo ajangzüktetsü ta amanger," ta COO aser director of cricket UPW Kshemal Waingankar-i ashi.

Mosquera Arsenal nung denogo

Chiteni/July 24, 2025 (Agencies): Arsenal-i sangdong ka ajanga ashiba agi, Valencia nungi Cristhian Mosquera euro million 15 agi alizükba sülen parnoki European football nung defender tashi taitba ka anisemogo.

Arishi küm 21 tain asayar yagi Arsenal den küm pongu atema tenangzüktepba yangluogo aser ano ita 12 atsülangtsü asoshi lenmang sadema lapoka yuogo.

Mosquera-i centre-back aser right-back naprongla asayateter aser pa squad nung Takehiro Tomiyasu melen asayatsü, shibai iba ita tetenzüklen tangatetep nung club toktsüogo.

"Ni iba ya koda süia meyoktet. Ni club tulu ka nung adener. Ner kibong den kodang na idaki arur indangji iba tesem ya koda tulu aji jangjar," ta Mosquera-i ashi.

"Kü indang career ya ni imlaba dang nungi takaraba ao aser ni kanga kara aitsüsa aküm. Idaki aruba ya maneni angazütsü aser renlokyonga aotsü atema maongka ka lir," ta paisa shisem.

Spain Under-21 team nungi asayar ya 2016 küm arishi küm

12 asüba mapang Valencia nung aden aser 2022 küm mezüngbuba first-team nungi asaya-a club nungi asayaba centre-back tanobusang aküm.

Mosquera-i Valencia nungi 90 ben asayaogo aser pa taoba season La Liga nung club asaya 38 nungi 37 nung asaya liasü.

Martin Zubimendi, Kepa Arrizabalaga, Christian Norgaard aser Noni Madueke nung club nung adenba sülen tang pa denogo aser Viktor Gyokeres-a club nung adentsü ana nung lir.

Mosquera ya Arsenal pur Asia nung oa pre-season tour asaya-a aliba squad nung adentsü, kechiyong pa den tenangzüktepba tembanga meyanglu tsüngda Valencia-i pa senzusenpongtsü atema temelaba agütsür liasü.

Arsenal-i Bodhbarnü Singapore nung National Stadium nung AC Milan goal 1-0 agi kokogo aser parnok Deobarnü kasa tesem nung Newcastle United den asayatsü.

Iba sülen parnok Hong Kong-i oa Tottenham Hotspur den asayatsü aser iba sülen London-i meyipa aotsü.

T20I asayamung atema Babar Azam meshim

Chiteni/July 25, 2025

(Agencies): Pakistan Cricket Board (PCB)-i West Indies den taruba white-ball asayamung atema asayartem sangdongogo. T20 asayamung atema Shaheen Shah Afridi team nung züngoksemogo saka taoba captain Babar Azam bo meshim.

Afridi, shiba tawa Bangladesh den asayamung atema meshimi liasü pa Florida nung WI den T20I asaya asem atema shimogo. Left-arm fast bowler ya Haris Rauf aser Hasan Ali na den külemi shimogo.

Kasa mapang nung Babar Azam ODI squad nung züngoksemaka T20I squad nungbo mezüngoksem, kechiyong asayar shimertemi Agha Salman-i anir lanur asayartemang maneni asayadaktsüner.

ODI team ya Mohammad Rizwan lenisüba nung asayatsü aser Agha Salman vice-captain asütsü. Afridi, Naseem Shah aser Abdullah Shafique nungera Trinidad nung ODI asem asayatsü aloba atema squad nung züngoksemogo, aser batter Fakhar Zaman-a team anaprongla nung shimogo.

Salman Mirza aser Ahmed



Daniyal nati Bangladesh den asayamung nung kanga junga asayaogo, saka tena T20I squad nung mali. Lanur asayar Saim Ayub, Hasan Nawaz, aser Sahibzada Farhan nung den all-rounder Mohammad Nawaz nung T20I atema shimogo.

Iba asayamung nung T20I asem Florida nung asayatsü aser iba sülen ODI asem Trinidad nung asayatsü.

Pakistan T20I squad vs West Indies: Salman Ali Agha (captain), Abrar Ahmed, Faheem Ashraf, Fakhar Zaman, Haris Rauf, Hasan Ali, Hasan Nawaz, Hussain

Talat, Khushdil Shah, Mohammad Haris (wk), Mohammad Nawaz, Sahibzada Farhan (wk), Saim Ayub, Shaheen Shah Afridi, Sufyan Moqim.

Pakistan ODI squad vs West Indies: Mohammad Rizwan (captain), Salman Ali Agha (vice-captain), Abdullah Shafique, Abrar Ahmed, Babar Azam, Faheem Ashraf, Fakhar Zaman, Hasan Ali, Hasan Nawaz, Hussain Talat, Mohammad Haris (wk), Mohammad Nawaz, Naseem Shah, Saim Ayub, Shaheen Shah Afridi, Sufyan Moqim.

BILEMDANGANG

"Angati anguba rongsen taolen memeteter."